

Sperone ist auch gar zierlich außgeschniten/ welcher vornen/ als bey
 6. ein Löwen/ Greiffen/ Tiger oder dergleichen Thier von Holz
 gearbeitet führen thut. Bey

7. seind zwen Argani, oder Trimmel/ mit welchen man nicht nur die
 Ancker/ sonder auch alles anders herauff ziehen kan.

Dem verstendigen Capitano ist vnnot vorzuschreiben / wieviel er
 Männer dise Nave zuregieren mitführen solle / aber. 40. Mann
 werden solche in fridens Zeiten zulaiten / wol versehen könden. Zu
 Kriegszeiten/ vnd da auff ein Impressa außgefahren wurde/ da
 mag man gar wol. 150. bis in. 200. Mann zum Angriff / oder
 Widerstand darauff setzen / beneben sie mit monition vnd vivers
 auff. 5. in. 6. Monatlang versehen. Da dann die Biscotten das
 fürnehmste / sampt einer Anzahl Holändisch Käß/ Schuncken/
 Butter/ Stockfisch/ Bier/ Essig/ Wein vnd Wasser hierzu von
 nöten seind.

Vnd nur mit wenigem noch etwas zgedencken/ so haben die Nider-
 länder auff ihren Schiffen viel besser/ weisser/ vnd wolgebachener
 Biscotten / als sonst nicht in Italia auff den Galeen zufinden /
 deswegen so thun sich ernante Niderländische Biscotten auch len-
 ger / vnd nemblich auff ein / bis in. $1\frac{1}{2}$. auch nochmehr Jahr lang
 ob den Schiffen gut erhalten.

Zu Genova haben diejenige Schiff / so nach Soria fahren wollen /
 zwayer sonderbaren Gutthaten / so nicht die geringste / sonder die
 aller notwendigste stuck bey der Schiffart seind / sich zugetrösten:
 Erstlich daß sie allda ein grosse Summa Baarschafft der stuck
 von acht Reali, das seind Spanische Taler (die dann im Teutsch-
 land auch einen Taler gelten) einzuwixlen finden / mit welchem
 Gelt sie dann in der gantzen weiten Welt in Einkaufung aller-
 hand guten Gaben fortkommen könden. Auß diser Ursach dann/
 manches Schiff dahinzufahren bezwungen wird. Zum Andern
 so befind sich gar nahend bey wolermelter Statt/ vnd al Ponte de
 Cornegliano, das Wasser Poncievera, dahin zum theil die Schiff
 fahren/ vnd allda die Wasserprovision einladen. Welches dann
 auch gut vnd hernach in den Schiffen lang zugenieffen ist/ sonst
 thut man in die Wasser Gefäß Kizlingstein / beneben sauberem
 kizigem groben Sand legen/ dardurch das Wasser sich purgieren
 kan/ vnd desto lenger mag gut behalten werden. In welchem sich
 aber gar vnterschiedliche acta erzaigen. Ins gemain geschichts/
 das sonst ein Wasser. 4. bis in. 5. Wochen lang erstlich zum trin-
 cken gut verbleibet / hernach aber so erzaigen sich kleine Würmlin
 darinn